There's Burns, poor fellow, king o' men, Could school the deil, e'en in his den, And man's frail heart, baith but and ben, Could praise or slight:

But no ae word wad condescen', 'Bout thee to write.

How braw he painted cutty-sark,
Wi' Satan hodging on the ark;
Within a near hand gun shot mark,
Tam might wi' ease
Hae thrown to him, wi' kind remark,

A pipe o' peace.

He might hae ta'en a puff or twa, His cantle he might gi'en a claw, Although his back be at the wa' Without a joke,

In the decreet might faund some flaw, To ease our yoke.

He might, 'tween ilka hornpipe reel,
Hae glamed the fussel and the steel,
A clout he might hae torn fu' weel,
Aff Cutty's sark:

Cats age are grey to touch or feel,
When in the dark.

When folk are dowff or screachin' glad, Or just like a March hare, run mad, Or lasses whingin' 'bout their lad That's promise broke,

There's naething will the passions sad Like a guid smoke.